



19. juni 2012

Inatsisartut suleriaasianni § 37 naapertorlugu Naalakkersuisunut apeqqutit imaattut saqqummiup-pakka:

(Inatsisartunut ilaasortamit Kim Kielsenimit, Siumut)

- 1. Ulloq 1. januar 2011-mi interneti atorlugu nukissaminik atuineramik naatsorsuutunik ”Naatsorsuutunik piujuartitsinissamut attuumassutilinnik” taaneqartunik atulersitsinerup kingorna Naalakkersuisut manna tikillugu misilittakkanik sunik pissarsippat?**
- 2. Naatsorsuutit piujuartitsinissamut attuumassutillit atorneqarnerisa siuarsarnissaat siunertaralugu misilittakkat qanoq annertutigisumik aqqissuussaasumik katersorneqarpat?**
- 3. Naatsorsuutit piujuartitsinissamut attuumassutillit qanoq annertutigisumik pisortatut oqartussaasuni, suliffinni suliffeqarfissuarnilu Naalakkersuisut atuutilersikkusuppat?**
- 4. Namminersorlutik Oqartussanik suliffeqarfissuit pigineqartut ”naatsorsuutit piujuartitsinissamut attuumassutilinnik” atuilernissartik allaffissornikkut atortorissaarutitigullu naammassisinnaagaat Naalakkersuisut isumaqarpat?**
- 5. Manna tikillugu aalajangerneqarsimasumit annertunerusumik naatsorsuutit piujuartitsinissamut attuumassutillit atornissaat Naalakkersuisut takorloorpat?**

Tunngavilersuut:

Taamanikkut inatsisartuusut 2006-imi upernaakkut ataatsimiinnerminni siunnersuutit UPA 2006/42 aammalu UAP 2006/58 akuersissutigimmasigit nuannaartoqarluni, qiimmattoqarlunilu avatangiisinut nukissanullu eqqummaarittoqaqaaq, tamatumalu kingorna naatsorsuutit piujuartitsinissamut attuumassutillit Namminersornerullutik Oqartussat suliffeqarfiini aammalu suliffeqarfissuini atorneqarlersussaallutik. Pisortat nukissiamik pingaarnermik innaallagissamik, imermik kiassarnermillu atuinerat saqquminerulersinniarneqarpoq, taamaalilluni kingorna anguniagaqartumik siunertaqartumillu nukissamik atuinerput annikillisinneqarsinnaaleqqulugu.

Maana siunnersuutit taakku inatsisartunit tamarmiusunit akuerineqarnerannit ukiut arfinillit qaangiussimalerput, ukiullu arfinillit taakku ingerlaneranni qanoq pisoqarpa?

Februar 2010-mi pissutsit pillugit apeqquteqarpunga, taamanikkullu marts 2010-mi ima siuarsimalersimatigalutik, aallaat interneti atorlugu aqqissuussinermik nukissamik atuineramik naatsorsuutunik isumaginnissinnaasumik nassaarsimallutik paasissutissiissutigineqarpoq. Interneti atorlugu aqqiissut taanna ulloq 1. januar 2011-mi atorneqalersussaasimagaluarpoq. Taanna suliffeqarfissuarnit pisortanit pigineqartunit qassiussusai ilisimaneqanngitsunit kiisalu suliffeqarfinnit kiisalu nammineq piumassusertit naapertorlugu peqataarusuttunit atorneqartussaasimavoq.



SIUMUT INATSISARTUNI ILAASORTAATITAT

Atagu toqqaannartumik oqaannaqilanga – Naalackersuisut siunnersuutinik akuerineqartunik piviusunngortitsiniarneranni aaqqissuussaasumik paamaarussiuarnerat pakatsissutigisorujussuara. Eqqortuusinnaangilaq uagut inatsisiliortuusugut piffissap qanoq ilineratigulluunniit Inatsisartut siunnersuutit akuersissutigisaasa qanoq ingerlaneri pillugit sorsuuteqartuarnissarput. Siunnersuutit akuersissutigineqartut aaqqissuussaasumik suliarineqarlutillu aaqqissuussaasumik malitseqartinneqartussaapput.

Naatsorsuutit piujuartitsinissamut attuumassutillit pillugit siunnersuutit taamanikkut massakkullu annertoorsuutinneqangillat. Pisortat atuinerisa eqqummaariffigineqalernissaat taamanikkut pineqarpoq, taamaalilluni tamatta ataatsimoorluta atuneq annikillisarlugulu nukittorsarsinnaassagatsigu.

Naalackersuisut apeqqutinik taakkunanga akissuteqarnerminni minnerpaamik siunnersuutit taamanikkut 2006-imi akuerineqartut minnerpaamik siunertarisaannut naapertuuttumik naalackersuinikkut siunertatik angujumasatillu saqqummiutissagaat kaammattuutigissavara.

Apeqqutima ullut suliffiusut qulit iluanni akineqarnissaa kissaatigaara.